

北京圖書館 編

北京圖書館藏珍本
年譜叢刊



第 193 冊

北京圖書館出版社



□ 北京圖書館 編

北京圖書館藏珍本
年譜叢刊

北京圖書館出版社

第 193 冊

第一九三冊目錄

袁屏山先生年譜	一
倬齋自訂年譜	六三
蠓園年表	六九
梁任公先生年譜長編初稿卷首至清光緒二十九年	九五

袁屏山先生紀念集卷一 碑傳

碑

袁樹五先生墓表

中國百年以前樸學大興魁儒碩學表章先哲扶掖後進蔚然爲學問淵藪至清季而此風浸替矣吾滇徵文考獻講學授書以承疇五寄庵南園蘇亭荔屏樂山知卿諸公之緒爲學子楷模者最近則有許五塘趙介庵陳虛齋諸老而集其成者爲石屏袁樹五先生海內識與不識凡論滇中近代學人者必首屈一指焉先生諱嘉穀字樹五別號澍圃晚號屏山居士蓋鄉先正張月槎朱丹木許五塘之流風未遠也先世習農而贈公榮祿先生始廣置圖書以教子孫兄弟八人先生次五甫五歲讀書能釋義兼擅諸兄之長光緒壬寅夫人張來嬪遂從學外舅廣文張竹軒先生學益進癸巳科試第一調經正書院高材生五塘虛齋爲之師孫明復亦以石守道而益彰矣甲午應優貢試膺首選旋膺鄉薦第二戊戌春闈報罷將母會垣入督學張殿撰建勳署課讀士林譽大震壬寅滇督魏尙書午莊薦試經濟特科翌年赴汴會試及第入都殿試登二甲賜進士出身朝考選翰林院庶吉士試特科中第一魏尙

書爲立大魁天下榜於城南聚奎樓鄉人榮之然先生之所以不朽者固別有所在也嗣是授翰林院編修派赴日本考察政學滇當局延爲留學生監督乙巳回國先後任學部編譯圖書局局長國史館協修功臣館纂修清奏議纂修學部叅議候補承參廷試外國學生襄校官憲政館諮議官進士館畢業襄校官實錄館纂修官東陵掃青官蓋居京師者凡六年己酉出任浙江提學使旋兼布政使浙爲文物名邦先生蒞之廣厲學官澄清吏治官民愛慕殆與香山東坡後先輝映焉辛亥國變浙人留之不可遂歸滇滇大府資爲黃髮之詢大學創興先生講授國學十餘年值學絕道喪言履行雜之秋先生融貫古今苞羅旁魄輾轉下上爲之明彰大中發露公器使新進小生得知塗轍有所遵循而不致有歧路之嗟望洋之歎其教人也言行而身化之被其容接誠明者達昏愚者勵蓋風雨沾浹枯槁爲華矣遇人無賢愚皆盡懽忻狀貌偉然而鬱如其充渙如其融汪汪若干頃波澄之不清撓之不濁端粹冲和高巖懿醇實出於性亦得於養聞其幼即喜讀宋儒書抗心希古浸灌日深故以事親則終身孺慕以接物則和氣迎人薰襲里閭沾溉來葉皆此物耳由是發爲文章昂然而峻亦坦然而親峭然而厲亦夷然而溫憂然而沉亦冷然而清熾然而

烈亦渾然而醉隆然而夏亦煦然而春且推此心以及古人謂滇雖僻遠然通人志士仍世相望而文字放佚湮鬱不宣心實耿耿於是搜訪前輩佳什鉅製零章甄采略盡以爲最後成之滇詩叢一百卷其他著述數十種一千數百卷皆精審博洽允足爲後世津逮其晚而喜佛亦復憂時與早耽宋學不忘經世理原一貫非有二也子五丕元丕佑丕濟義宗不釐義宗早殤丕釐側室劉出女四厚芬靜芬淑芬榮芬孫五孫女八一門鼎盛續緒誦芬亦足爲國人矜式也已不佑襄余戎幕故得詳其生平生前自爲壙銘曰了不知歷幾歲月夢夢幻幻以逮今日之前忘矣今日之日行矣明日之日藏矣不必銘亦不必不銘銘曰斯我之身體耶曰非也我父母之遺也庶幾乎庶幾乎父曰嗟我鑒於天汝勿我違母曰嗟我生於西汝於我歸茲非所謂命物之化而守其宗者耶先生生於清同治十一年壬申七月二十日子時卒於民國二十六年十一月二十二日子時享年六十有六其世系及遺著詳目別有傳不具述先生內行完粹教澤在人故述其商量舊學闡揚先達獎寵後進之聲聲大端揭於墓道以式鄉邦而詔異世滇黔綏靖主任雲南省政府主席通家弟龍雲敬撰

傳

袁樹五傳

陳古逸譔

君諱嘉穀字樹五別字澍圃晚自號屏山居士石屏縣人代有隱德至厥考凝道封翁懷藏書挿架牙籤度儲甚富有丈夫子八君其第五幼有異稟彊記憶齡齡嗜學有妙悟落筆即無凡響伯兄嘉樂嫻詩文經史仲兄嘉謨嫻詩賦叔兄嘉猷嫻書法君皆從學同氣之親而尊如師保齒益長學益進光緒丙戌君年十五補博士弟子員癸巳科試第一食餼學使項城高勉之先生奇賞之咨送經正書院高材生學使大儒不徒奇君之文亦以其閱理學宗傳於陸王之學有所發明也經正書院者爲貴陽陳崑山先生淑建顓課經史詞章主講許葑山陳小圃兩先生皆碩學通儒同學二十四人顧最激賞君繇是治毛詩肆力考據詩古文詞經世之學博稽中外尤所殫心甲午試優行第一鄉試中式第二戊戌春闈不第南海康君有爲新會梁君啓超設學會於京君亦與焉適政府以滇越鐵路許法築君具書力爭呈格不上發憤歸有丈夫不作楚囚泣句聞者壯之自時厥後住院潛修者五年平生學業得力於此清季朝政不綱天下飢餓隱患滋潛朝廷思有以補救之求才甚亟詔仿博學

鴻詞例開經濟特科飭廷臣臺吏薦舉賢才雲貴總督邵陽魏公疏薦君徵車如都
值癸卯春闈捷南宮入詞垣特科廷試初列二等覆試策內政外交君條陳時政落
落萬言廼邀容賞褒然首選準詞科例當有不次之遷有甚之者僅免其散館授職
編修君亦無怏怏色人或爲之不平君淡然曰朝廷用人自有權衡得是已不遜於
鼎甲何缺望爲人以是欽君之學益服君之養中間任國史館協修功臣館纂修清
奏議纂修廷試外國學生襄校官憲政館諮議官實錄館纂修官東陵掃青官胥舉
其職大學士榮公長學部辟君編譯圖書局長君網羅海內耆宿聚之一堂上下古
今斟酌中外遠密商量成教科書甚夥譯外國文書刊印流通書坊以新著專利求
審定粹者可之駁者否之不徇情不受方物時論以爲公丙午詔舉人才當宁者願
爲數人致通顯君非其夾袋人才乃臺吏交章薦君謂其才可大用詔見奏對稱旨
君以滇爲西南門戶山路崱嶸非速築鐵路不足以利交通固國防上韙其議下部
籌設旋得旨以學部丞參候補未幾拜浙江提學使之命己酉九月到任于兩浙十
一郡各設初級師範中學工校醫校水產校農校及各縣小學擴充至四千餘校
又建西湖圖書館奏准以文淵閣秘籍皮置其中以供衆覽教澤覃敷學風丕振浙

人至今誦之。復兼署浙江布政使。一準任官。惟賢節用。愛人之旨。藩庫庫帑出入有
羨。餘庫吏循例以進。曰：「此陋規也。」歷任胥受而不辭。君却之曰：「陋者規。匪陋者心。吾
其能以陋規陋吾心乎？」君弟少凝爲蜀鄰水令。有惠政。勤勞卒於官。時太夫人年逾
大耋。君慮其慟而致疾。請假歸。覲晨昏。定省食。必先嘗。暇則依依膝下。舉京朝掌故
以博歡愉。太夫人病瘳時。或助諸孫挽輿奉母遊行庭中。老萊斑衣。不過是也。假
滿回任。朝廷方嚮用。君封圻亦意中事。而滄桑遽變。浙人留之不得。君亦兩袖清風
歸矣。二十餘年間。所事要以教育爲最。君固負大志。而未竟其才。意以爲天下之治
由于人才。人才之興。基于教育。果以所志所學授于人。筆于書。佗日人才蔚起。大用
大效。小用小效。即不樂仕進而隱于閭里。亦可以操行之潔。釀爲善俗。用世之心。未
嘗不可少慰。遂一意教育。著書講學。士之秀者爭以得一及門爲幸。請業請益。限穿
座滿。君亦口講指畫。孜孜不少倦。任雲南大學教授者十年。門牆之盛。一時無兩。歲
月不居。忽忽已老。丁丑倭犯諸華。君居恒書空咄咄。悲憤填膺。以憂致疾。于十一月
二十一日逝世。配張夫人爲同邑清忠義竹軒先生女。先君十七年卒。子四人。能世
其學。長丕元。肄業北京大學。次丕佑。美國孟雪維尼亞大學教育學士。歷任雲南民

政教育廳長蒙自關監督省政府秘書長次不濟美國麥其根大學數理博士任中
央資源委員次不釐庶出幼讀女子四人孫五人女孫八人君所著書已刊者有講
易管窺三卷孔氏弟子籍一卷臥雪堂文集二十二卷詩集十二卷續一卷詩話八
卷外集十卷演繹四卷未刊者有移山綴隨筆著書樓隨筆定香亭筆談東游日記
聞聞見見錄季漢迄五季諸儒通義讀史札記四書札記滇詩叢錄漢孟孝琚碑
跋兩湖輔軒三錄滇南文獻備徵錄滇南大事記國史功臣列傳石屏縣志又沿
革志

論曰君固才人也學人也亦至性人也內性出以純摯孝敬友于一不矜飾學問不
歧演考據義理無所偏倚淹貫羣籍折衷至當文則上探周秦諸子而以龍門爲歸
磅礴典奧雅近昌黎詩則宗仰杜陵上窺漢魏兼有眉山遺山之長其與人接物和
易慈祥而無孤癖峭厲之行尤復宏獎風流一語之精一字之韻獎藉恒不容口交
友以誠志同道合則白首如新晚研窮釋典清修梵行栖心淨土手書佛經至百餘
種海內耆宿翹然爲西南望擢巍科躋高位又其末焉者矣然中遭鼎革不克以勛
業著其不幸獨君也矣哉

先嚴樹五府君行述

嗚乎 府君逝矣追溯一生生於石屏長于石屏攻讀于省宦于薊宦于浙遠遊于
京鄴瀛島跋涉里程公車屢屢足跡遍于全國其所以處家庭者事雙親愛昆弟待
族人以慈以和教子女勤勤懇懇終身無倦容其所以處社會者居官則必勤必勞
遇學子青年則誘導多方辦學校捐公益待僚吏則勵品行示寬厚處躬克己則惟
儉惟樸當食則顆粒必惜之着衣則敝舊以爲常位高一品不自居其榮不自顯其
勢讀書著書迄老不輟邦之人士樂與交遊凡受其陶鎔施與者無不時稱道之
茲謹述其事實如左 廩史官之採擇焉 府君諱嘉穀字樹五別號澍圃晚年自號
屏山居士兄四諱嘉樂嘉謨嘉猷嘉言姊一適許氏弟二家 七叔與 先八叔諱
嘉端者是也少之時同受 先祖榮祿公教蓋吾家 榮祿公以前皆耕農習商自
榮祿公始廣置圖書於家以爲子孫讀書久遠之計於是一門雍容咸從事於讀
經課史之樂 府君生而遭地方不靖五歲受學學三字經千字文於 榮祿公口
講即時成誦能釋字義每從遊名勝即能述其楹聯無訛 先伯嘉樂公長於詩文
經史 嘉謨公長於詩賦聯語 嘉猷公長於書法 府君從學皆能得其長每讀書

從之學學益大進癸巳應科試列第一調經正書院高材生 府君少嗜宋儒書以五子近思錄朱子小學爲本著有語錄數十條又兼學陸王之學目不邪視口不妄語交友必慎事親必順居家必和鄉人咸以佳子弟稱之入經正書院後每歲作日記迄老不輟與省中學子相砥礪交遊始廣掌院許節山陳小圃諸先生更教以治詩經習漢學習經世學甲午應優貢試列第一鄉試中第二名戊戌入燕京會試報罷歸著公車集詩一卷小圃先生題云世人下第嗚咽沾巾而詩云丈夫不作楚囚泣何壯哉己亥與 張太夫人迎 先祖母徐太夫人到省以書院膏火資供甘旨夜半見月出驚爲日出即起丁亥屏城大地震 府君居屋牆下牆傾向外獲免衆是以奇之光緒十六年庚寅 先母張太夫人來嬪廣文張竹軒公女也 府君又恒列第一人戲以課王呼之桂林張殿撰建勳來滇督學延入學院授讀壬寅邵陽魏尚書午莊督演試府君策以賈誼陳東山之送入京並保薦試經濟特科十二月起程翌年二月抵汴會試四月到京應殿試登二甲賜進士出身朝考選翰林院庶吉士試特科 府君得題後成竹在胸下筆萬言試二場場各十六開初試列二等第七名覆試列第一名相傳稱三十二開學士經濟特科者貴州學政嚴修奏設坊

博學鴻詞之例也因制科廢而真才未舉故曰特科示有別於制科也上諭下因戊戌政變中止辛丑諭復行癸卯卷試府君以魏尚書奏保得中第一蓋正科之後始終十年待府君爲大魁亦一奇也魏尚書乃立大魁天下榜於省城南聚奎樓上國人表敬召授職翰林院編修免其散館甲辰奉派到日本考察學務政務名住宅三層樓曰松風以貞白自況也滇中以滇學子游日者漸多延府君爲學生監督府君分學生爲政治實業師範武備四科學生於受校課之餘皆從府君習經世之學乙巳回國函召張太夫人於回屏省親之後率不孝不元不佑厚芬靜芬至上海相遇同入京居延旺廟街題寓屋曰望雲軒後移居鐵門自是京居凡六年先後任學部編譯圖書局局長國史館協修功臣館纂修清奏議纂修學部參議候補丞參廷試外國學生襄校官憲政館諮議官進士館畢業襄校官實錄館纂修官東陵掃青官之類京秩清苦張太夫人黎明興起舉凡洒掃針線皆必躬親杜絕華俗應酬之事與在滇時無二不孝淑芬不濟次第生益感家用之煩更以勤儉爲勵府君則供職政事朝出暮歸乘笨騾車入館編譯題樓曰著書樓廣徵閱才碩學之士萃集一時清季廢科舉立學校編小學中學教科書蓋自此始教科書之外又翻譯外國文書

籍廣刊印於天下從事者共繪著書樓圖題詩和詠傳爲一時之盛云己酉九月赴任浙江提學使十二月兼布政使京友猶作春明餞別圖贈詩百餘首題曰惜別友聲集亦已見府君處已待人惟誠惟敬交誼厚感深刻也居浙理政日與科員同堂辦事於學務公所中開全省中學校校長會議全省師範學校校長會議浙省十一府各設中學又加全省初級師範中學工校醫校水產校農校以及各縣小學先後擴充四千餘校學風教澤一時並興又建西湖圖書館奏准以文瀾閣藏書置館中供衆閱覽亦提倡社會教育之一端也州縣奉公必待視察府君親至浙西視學指示辦法隨從僅科員一視學員一僕一所至自備費用不令地方官知之而有所供應也浙學署內有定香亭池水清滢蓮竹幽翠阮文達公舊建也府君命工稍加修葺暇則以同僚名士唱詠其中兼課不孝丕佑以文筆作定香亭聯句詩仿柏梁體命丕佑書石刊於池畔是年先八叔鄰水公卒於川任府君聞信悲念手足又恐徐太夫人聞之乃請假三月回屏省親孝友之誠備其極矣甫假歸辛亥革命作浙人有留府君之請至滬滬上有邀入各省聯合會之議府君念親心切皆婉謝之壬子春率家人自海道歸命張太夫人率不孝等至昆明已則取道

逕歸石屏蔡都督松坡聘爲叅議辭不獲至省癸丑以叅議院議員入薊京甲寅復歸滇唐都督莫耕任巡按使志清皆聘爲顧問丁巳徐太夫人卒于家營喪葬後返昆明自是居昆明賃屋於得福巷榜連屋曰移山籓府君以半生顯宦並無一椽之屋素亦安之而張太夫人以省居子女就學爲便賃租困難屢以小建新屋爲請己未乃商築於九龍池北未成而張太夫人卒營葬事卜窆窆於金馬山之陽屏絕俗習親監工程既竣告不孝等曰陰陽之說不足信吾卜之汝母安之他日合葬可也但新屋始成汝母克不偕室家含飴之樂爲耿耿耳嗚乎孰料府君今日亦棄不孝等而長逝乎府君一生言行表表今紀其大者不及萬一然尤有不敢忽者府君生平儒宗琳瑯著作已刻未刻爲己身學問所寄託者有如臥雪堂文集二十二卷詩集十卷續集二卷詩話八卷外集十卷滇繹四卷移山籓隨筆五卷著書樓隨筆定香亭筆談東游日記聞聞見錄季漢迄五季諸儒通義讀史扎記四書扎記之類以昭前賢者有如漢孟孝琚碑跋兩浙輶軒三錄滇南文獻備徵錄雲南大事記石屏公米店徵信錄國史功臣列傳石屏縣沿革志修滇詩叢訂張月槎先生留硯堂集六卷之類爲親友家人彰前勵後者有如先芬錄冰玉集遺愛集滇南

書畫集東陸詩選之類他如表彰薛爾望先生張竹軒外舅則建碑於其故里錢南園先生則影印其書畫爲冊居浙居滇遇水旱災則捐金急賑不惜破費公益之事不勝枚舉于已則朝夕皆以閱覽爲樂案上床前書堆縹緲書字則以王歐爲本兼取褚法歷年足跡所至求書作銘贊壽文者踵接如山陰道上府君隨手成稿自張太夫人逝世始習佛經研佛學邃密精深至於大澈大悟日則誦佛經於三層樓手寫佛經典百餘種如涅槃經圓覺了義經阿彌陀經觀無量壽經則遠寄藏於江浙名山大寺以示誦仰之誠於滇中名山佛寺則偶游彌月持經寫經摩崖題字去歲友人約游鷄足山登楞嚴塔供養手書楞嚴咒於塔上二十餘日而歸舉凡念佛誦經之事雖朝夕弗遑而不與世俗同一旨府君體素康彊愛_{不孝}等授學培植時時以自立爲勵家居則膝前指示雖對成年體貼猶如在襁褓邇年弄孫含飴教書習文興之所至高聲朗誦剖折經子講演史績元元本本聞之感動前歲率_{不孝}至元歸石屏祭掃先塋一次去歲聞外侮日亟顧_{不孝}等而言曰人知愛國愛家必以學問經驗立其根本處心積慮者久矣我則人民知識猶淺不暇自顧徒以大國自豪人侵我我不備戰事起人民塗炭吾不忍見之矣乃自著壙銘曰了不知歷幾歲

月夢夢幻以逮今日之前忘矣今日之日行矣明日之日藏矣不必銘亦不必
不銘銘曰斯我之身體耶曰非也我父母之遺也庶幾乎庶幾乎父曰嗟我鑒於天
汝勿我違毋曰嗟我生於西汝於我歸書石命刊不令不孝等知之恐知之而有傷
感也冬十月精神見衰言笑頓減十一月初臥疾不孝等延醫傳藥不進領首而已
二十二日子時溘然長逝距生於前清同治十一年壬申七月二十日子時享六十
七上壽配張太夫人生不孝等不元丕佑丕濟義宗丕釐義宗早殤不釐妾劉氏出
女四 厚芬靜芬淑芬榮芬孫五 績棠績琦績申績康績斌 績申績斌早殤孫女
八婉芝轉芝荀仁孟仁近仁萃芝奐芝魯芝 當徐太夫人八旬大壽之年玄孫天澤
生一門大小百餘人五世一堂遠近咸來稱賀云餘備家乘不備書

袁樹五先生傳

門人張連楹述

石屏文教自昔爲吾滇最元明以來代有傳人至清極盛月槎丹木皆以文章彪炳
於世而吾師袁樹五先生山水所鍾家學淵源即生於其間世徒知先生科名震一
時而不知人師經師兼而有之先生諱嘉穀號屏山別字樹圃樹五其字也少有異
稟從諸兄學盡得其長十歲時父雇工修祖塋諸兄往書碑父在家思之應增十餘